

Habitantenan ta pidi pa un parke y suplica tranquilidad, pero realidad ta otro

ORANJESTAD - Grandi ta e desapunto pa siña cu Gobierno no ta scucha su pueblo y ta converti Plaza Libertador Betico Croes den otro Entertainment Center. Cu na lugá di trece tranquilidad pa su hendenan ta trece mas desorden y inestabilidad den e barío.

Esnan cu ta circula den Oranjestad den e dianan aki a nota cu tin trabaonan grandi di construcción ta tumando lugá riba Plaza Libertador Betico Croes y nos di Bon Dia Aruba tambe a elabora caba riba esaki.

Ministro di Cultura señor Otmar Oduber a dicidi di converti e Plaza aki den un

escenario pa asina celebra na grandi 30 aña di Status Aparte y 40 aña di Himno y Bandera. Riba dje kier promove mas actividad cultural y e Plaza lo mester wordo transforma pa por sirbi e fin aki.

Actividadnan lo bay tuma lugá durante henter aña! Locual cu nos ta compronde ta cu ta via di un veredicto di hues a mara eventonan den Aruba Entertainment Center (AEC) na orario y na cantidad di decibel. Awor pa asombro di esnan cu ta biba cerca tur locual no por mas den AEC awor si lo bay ta posibel riba un Plaza habri, den pleno area residencia (bebouwde kom), sin cu tin facilidad sanitario, parkeerplaats sufi-

ciente y ta causa bastante molester tambe pa Hotel Talk of the Town na unda turistanan kier huesped den tranquilidad.

Nos di Bon Dia a haci un investigación y berdad a topa no cu un, sino varios veredicto di hues cu ta proteha pueblo di molester en general cu ta wordo causa pa establecimientoan rond nos isla.

Nos por cuminsa cu e veredicto di Accion Pro Tranquilidad entama contra AEC, tambe veredictonan contra Club 21 (ex Trocadero), La Ronda den Socotorolaan. Diferente caso di Radisson Hotel (awor Hilton Hotel) contra Sandbar/Sr. Frogs/Hard Rock Cafe. Un di e

veredictonan mas recien y kisas esun mas interesante ta esun cu habitantenan di Palm Beach a entama y gana contra Sandbar. Aki hues a dicta cu no por molestia esnan cu ta biba cerca cu zonido ya cu tur hende tin e derecho di tin paz den nan cas.

Tampoco por keda sin menciona e caso cu e Grupo di preserva area di Malmok a lanta contra presencia di un Heliport y e Boutique Hotel OceanZ. Ambos proyecto a wordo para pasobra a demostra cu nan lo causa molester na e habitantenan den cercanía directo. Locual ta resalta den tur caso ta cu TUR esnan cu ta wordo perhudica ta pidi un solo cos, esta pa re-

speta tranquilidad den nan cas y pa no mete den e derecho sagrado aki.

Awor e pregunta ta, pakico core e riesgo cu atrobe pueblo lanta un caso contra gobierno? Y mirando tur veredicto cu ta existi gobierno lo perde sigur! Pakico no ta scucha pueblo, den e caso aki, duna realce na nos libertador y traha di e plaza un bunita parke y asina honra e estadista mas grandi cu Aruba a conoce. Por ta sigur cu famia di Sr. Betico Croes (q.e.p.d.) lo aprecia mas si nan tata haya un parke bunita y tranquil na lugá cu ta tene actividadnan rond di dje cu ta causa molester na e pueblo cu tanto el a stima. □